

Date – 05/08/2025

**Time - 7:30 -7:40Hrs
AKASHVANI AIZAWL**

REGIONAL NEWS BULLETIN

HEADLINES (MORNING)

- 1. Larsap, Gen (Retd) Vijay Kumar Singh-an ASF avanga sum leh pai channa nasa tak thleng leh mipuite khawsak leh nunphung a nghawng nasa chu veiawm a tih thu a sawi.**
- 2. Health Minister Pi Lalrinpui'n Aizawl Civil Hospital-ah damlote tana taksa khawl thenkhat thlak tura hmalak mek a ni a ti.**
- 3. Prime Minister Narendra Modia hmalakna Parikhsa Pe Charcha chu thlakhat chungga inziaklut tam ber niin Guinness World Record ah ziahluh a ni**
- 4. External Affairs Minister Dr.S.Jaishankar-a chuan nizan khan BIMSTEC Traditional Music Festival hmasa ber New Delhi-a Bharat Mandapam-ah a hawng.**

<><><>

GOVERNOR

Larsap, General (Retd) Vijay Kumar Singh-an African Swine Fever-in Mizoramah kum 4 lai harsatna a thlen tawh avanga sum leh pai channa nasa tak thleng leh mipuite khawsak leh nunphunga nghawng nasa tak thlengte chu veiawm a tih thu a sawi.

Vawk pul hri African Swine Fever (ASF) chungchanga Mizoram dinhmun bakah department hmalakna leh hmachhawp tlangpuite sawipuiin nimin khan Larsap, General (Retd) Vijay Kumar Singh-an A.H& Vety. Department Secretary Pu Lalsangliana leh hotu dangte chu Raj Bhavan-ah a kawm a. Larsap chuan vawk hrileng thunun tura AH& Vety. Department hmalakna, hemi kawnga harsatna tawh leh rawtna an neihte hriat a duh avanga meeting neih a nih thu sawiin, ASF avanga harsatna thlengte khuahkhirh turin Department mal hmalakna a tawk lova, line department hrang hrangte leh mipuite nena thawhona tha neih a ngai a ni, a ti a. Harsatna leh rawtna an thlente chu theihtawp chhuaha lo bawhzui sak a tum thu a sawi bawk.

Meeting-ah hian AH& Vety. Department hotute chuan Mizoram chu ASF in a chenchilh flat tawh avangin, khuahkhirh turin hridanna kalpui chu hmalak theihna awm chhun a nih thu Larsap hi hrilhin, tun dinhmunah India ramah ASF vaccine a awm loh avangin a siam chhuaktu Vietnam atanga lakluh dan a awm em tih ngaihtuah a tul thu an thlen a. Sawrkar laipui atanga fund hmuh kawngah harsatna a awm avanga compensation duh anga pek theih a nih loh thu pawh an thlen bawk.

Mizoram chu Disease Diagnostic Laboratory tihchangtlunna tur, Pandemic fund project dawng tur phase 1 a state 14 thlan chhuah zing a a tel thu leh, he project hnuaiah hian NABL accreditation nei turin hmalak thuai tum a ni a. Laboratory-ah hian kumin March atang khan sample 221 test niin heng zinga 142 te chu ASF a ni tih PCR hmanga finfiah a ni. ASF avanga harsatna tawhte zirchiang turin National Institute of Veterinary Epidemiology and Disease Informatics (NIVEDI) Scientist/expert-te biak fel an nih tawh thu leh September-ah Mizoram an rawn tlawh hman beisei a nih thu tarlan a ni a. Heng bakah hian ASF chungchang inzirtirna zau zawk kalpui leh thu pawimawhte inhrilhhrlat zung zung dan turte, Line Department dangte nena tanrual dan turte, vawk thi sawngbawl dan bakah pawimawh dangte sawiho a ni.

<><><>

MNF

Chief Minister hlui, MNF President Pu Zoramthangan Mizoram Sawrkarin a ruka State Capital Aizawl atanga Thenzawla sawn a tum dan kalphung chu thil kalhmang a ni lo a ti.

Nimina MNF Party Office Mizo Hnam Run-a an party political sessionah he thu hi sawiin MNF President chuan, Mizoram state Capital Aizawl hi Thenzawlah sawn dawn pawh nise, Aizawl mipui tam zawk fein rem an tihpui loh tur a ni a. Rem an tihpui loh mai ni lova, an sawrkar kalpui dan kalphung chu an nuh tiza tur a ni. Tun dinhmunah Khawpui sawn chu thil harsa tak, sum leh pai tam tak luanralna tur leh mi tam tak nghawng tur a nih avangin, mahni duhthua thil kalpui ngawt chi a nilo, a ti bawk.

Chief Minister hian Aizawl khawpui tawt lutuk tihziaawmna tura ‘peace city’ din tum a nih thu bak mipui ah puanzar a la nei lo tih sawiin, NGO te leh Party hrang hrang bakah Zoram mipuite pawh rawnna pakhat mah a awm hriat a ni lova. Hetiang thu liantham hi chu Cabinet Meeting thutlukna tal pawh awm tur nia a lan laiin, chutiang chu Zoram mipuite hian an hrelo a, Chief Minister thil tih dan chu thil nihphung pangngai nilo, mipuite tana pawmpui remchanglo a ni a, MNF tan pawh Khawpui sawn tum dan kalphung chu pawm chi ni lovin, a thalo an ti takzet a ni, a ti bawk.

Hetihlai hian, UD&PA Dept chuan Thenzawl Peace City project chu state capital sawnna tur project niawmin tunhnaiah sawi a awm a. Hei hi sorkar laipui atanga lehkha lokalah ziah sual palh a awm vang a ni a ti a.

Thenzawl Peace City project Detailed Project Report (DPR) siamna tur atan hian sawrkar laipui, Ministry of Housing and Urban Affairs (MoHUA) chuan cheng vbc10 a sanction tawh a, state capital sawnna atan ni lovin Thenzawla Peace City atan DPR pawh ruahman mek a ni tih thuchhuah siamin a sawi a ni.

<><><>

HEALTH MINISTER

Health and Family Welfare Minister Pi Lalrinpui'n Aizawl Civil Hospital-ah damlote tana taksa khawl thenkhat thlak tura hmalak mek a ni a ti a, Organ thlak kawngah miretheite tan vanneihna kawl a eng tep a ti.

He thu hi nimina Directorate of Hospital & Medical Education (DHME) Auditorium-ah State Organ & Tissue Transplant Organisation (SOTTO) Mizoram, buatsaiha '15th Indian Organ Donation Day', a hmanpuinaah sawiin, Health Minister Pi Rinpui chuan Sorkar laipui nen tangkawpin, Mizoram chuan SOTTO Mizoram kaihhruaina hnuaiha damlote tana mihring taksa khawl thlak theih tur, Organ transplant kalpui ve thei turin hma a la tan chho ve bek bek a, a bul tan nan, Civil Hospital Aizawl-ah Kal thlak thei turin hma lak chhoh mek a ni a ti a. India rama Kal natna enkawlina lama hmingthang tak, Institute of Kidney Diseases and Research Centre, Ahmedabad-te nen MoU buaipui mek a ni a ti.

Health Minister chuan National Organ & Tissue Transplant Organisation (NOTTO) report-a a lan danin, India ramah kum 1-ah mi Nuai 2.5 bawr velin kal thlak an mamawh laiin, mi 5000 bawr chauhin Kal dawn tur an nei a; Thin thlak ngai mi Sing 5-ah mi 1500 bawr vel chauhin a thlakna tur an hmu a; Lung thlakna tur pawh kum 1-ah mi 5000-ah mi 200 aia tlemin an hmu tawk tih sawiin, India rama taksa peng thlak ngai mi tam tak zingah hian Mizo engemawzat an tel a, nunna chan phah hial pawh an awm tih sawiin, a mamawhtute hnena taksa peng pek - organ donation chu a ngaipawimawh hle a, Mizoramah pawh kalpui a nih ve theih nan health care facilities thuam chak tura hma lak mek zel a ni a ti a, mipui lamah a mamawhtute tana taksa peng pek, organ donate chungchang inzirtirna neih nasat a ngai a tih thu a sawi bawk a ni.

He hunah hian organ donation chungchang chu kalkhawm te hrilhfiah an ni a, an taksa peng mamawhtute tana petu leh dawngtute thusawi ngaihthlak a ni a, he ni puala organ donation pawimawhna Reels insiamsiaka titha zual 3 te hnenah lawmman pek an ni bawk.

<><><>

BJP MIZORAM

Tribal Nula Rethi tak tak te an puih kawng a Kerela a Catholic Nun pahnih ten Jail an tan phah chu BJP Mizoram chuan pawl a ti takzet tih thuchhuah siamin an sawi a. Kerela a BJP State President Central Minister pawh lo ni tawh Rajeev Chandrasekhar leh a thawhpui te pawhin zan pawh mu meuh lo in Kerela Nun pahnih te jail atanga chhuah zalen an nih thuai nan hma an la a, a bul atanga a tawp thlengin Nun te tan hian an ding nghet tlat a ni an ti.

BJP Mizoram chuan Chhattisgarh a BJP State GS Sanjay Srivastava leh Narayanpur Bialtu MLA Kedar Nath Kashyap te chu phone ah bia in Tribal hmeichhe pathum leh an chung te ngaihven turin ngen an ni tih an sawi aa. Narayanpur SDM leh Narayanpur Panchayat CEO te pawh biak niin, tribal hmeichhia harsatna tawk te Sarpanch/VCP te nen a theih dan dan a ngaihven turin an ngen bawk an ti a, thu belhchian dawl a nih leh nih loh chik loh vanga chetlakna in, tharum thawhna te hial a thlen fo thin chuan engkim a fimkhur ngaih zia a tilang chiang hle a ni an ti a..

Midang tana inpe Missionary ten Chhattisgarh a Tribal rethei te zinga an rawngbawlina hian ngaihhlut a hlawh em em a, Pathian pawhin an rawngbawlina mal a sawm a, tihdam rawngbawlina te pawh Pathian in a hmang nasa hle a ni. Chuvangin BJP Mizoram chuan Nun 2 te leh an thawhpui te tawrhna hian rah tha a chhuah zel ang tih an ring tih an sawi bawk.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia hmalakna Parikhsa Pe Charcha chu thlakhat chhunga inziaklut tam ber niin Guinness World Record ah ziahluh a ni. He flagship programme hi Citizen Engagement Platform zingah mipui telna tam ber niin a vawi riatnaah khan mi vaibelchhe 3 leh nuai 53 an inziaklut a. MyGov Platform hmangin Parikhsa Pe Charcha ah hian inziiahluh theih a ni. He hmalakna kaltlang hian Prime Minister Narendra Modia chuan zirlaite, zirtirtute leh nu leh pate nen inkawmhona hun a hmang thin a ni.

<><><>

BIMSTEC MUSIC

External Affairs Minister Dr.S.Jaishankar-a chuan nizan khan BIMSTEC Traditional Music Festival hmasa ber New Delhi-a Bharat Mandapam-ah a hawng. Thusawiin Pu Jaishankar-a rimawi chuan hnam hrang a thuikhawm thin tih sawiin hnam rohlu leh nihna pholangtu anih thu a sawi.

BIMSTEC Music Festival ah hain India, Bangladesh, Bhutan, Myanmar, Nepal, Sri Lanka leh Thailand atangin artist an kalkhawm dawn a ni. BIMSTEC Music Festival hi Indian Council for Cultural Relations (ICCR) huaihawt niin a hmingah Saptasur: Seven Nations, One Meledy vuah a ni a. BIMSTEC ram pasarihte atangin rimawi chi hrang hrang tarlan a ni ang.

<><><>

RACING

National Motorcycle Racing Championship 2025 neih mekah Mizo rider Daniel Lalhriatkima chuan 130-165cc ah pakhatna a ni. He intihsiakna hi Madras International Circuit ah neih mek a ni